

SARS e tla phethahatsa mehato ya tshohanyetso ya kimollo ya lekgetho

Tshwane, 30 Phupu 2021 - Ka Sontaha Mopresidente Cyril Ramaphosa o tsebisitse mehato e mmalwa ya tshohanyetso ya kimollo ya lekgetho e le ho arabela sewa se ntseng se tswela pele sa Covid-19 mmoho le merusu ya morao tjena eo sepheo ka yona e leng ho thusa dikgwebo tse ikobelang tefo ya lekgetho ho iphumana hape le ho netefatsa maphelo a basebetsi ba tsona.

Ditshebeletso tsa Lekgetho tsa Afrika Borwa (SARS) di tla phethahatsa mehato ena ya kimollo ya lekgetho hobane balefalekgetho ba ikobelang tefo ya lekgetho ba lefile karolo ya bona e seng leeme ya lekgetho mme sena se kgontsha mmuso ho fana ka thuso ena ya nakwana ka dinako tsena tse thata haholo.

Khomishenara ya SARS Edward Kieswetter o itse, "Kotara ya pele ya selemo se hodimo sa ditjhelete e fetile ditebello tsa rona mme ya sebetsa hantle le ho feta ha ho tluwa ho tsa pokello ya lekgetho papsiong le nako e tshwanang ya dilemo tse tharo tse fetileng."

Mong. Kieswetter tobokeditse boitlamo ba SARS ba ho fana ka tlhakisetsa le netefaletso ho balefalekgetho hore ba tle ba kgone ho phetha boitlamo ba bona ba molao le ho lefa se kolotuwang. O boletse hore SARS kamehla e tla tsitlallela ho "nolofaetsa balefalekgetho dintho le ho etsa hore ditransekshene tsa bona le mokgatlo di thelle habonolo."

Le ha ho le jwalo, o ile a romela molaetsa o hlakileng le o sa lobeng letho wa hore SARS e na le bokgoni ba "ho fokisa le ho etsa hore balefalekgetho ba sa ikobelang boitlamo ba bona ba tefo ya lekgetho le ho ba karolo ya diketso tsa bonokwane le tsa boqhekanyetsi kgahlano le mokgatlo ba jare boikarabelo ba ditjeo tse hodimo."

"Tshebediso ya *data* e kgolo, bohlale ba maiketsetso le theknoloji ya morarao tjena e kgontsha SARS ho fana ka ditshebeletso tsa dijithale ho sireletsa balefalekgetho le basebetsi ba yona ka nako ena ya dithibelo tsa Covid-19 mme sena se boela se tshehetsa boiteko ba SARS ba ho phethahatsa thomo ya yona."

Mehato e tlang ho phethahatswa ke SARS ke ena:

- Katoloso ya Lekgetho la Kgothatso ya Khiri le seng le atolositswe ho akaretsa dilemo mmoho le bokaalo bo ka tsekuwang, eo sepheo ka lona e leng ho tshehetsa ho hlolwa ha mesebetsi dikarolong tse kotsing ya ho utliswa bohloko tsa mmaraka wa tsa basebetsi. Sena se tla sebetsa nako ya dikgwedi tse nne mme se tla qala ka la 1 Phato 2021 mme se fele ka la 30 Pudungwana 2021.
- Ho atoloswa ha ho fanyehwa ha tefo ya dikoloto tsa basebetsi tsa lekgetho (tse tsejwang ka hore ke Lekgetho la Lefa ha o ntse o fumana moputso (PAYE) bakeng sa dikgwebo tse nyane ho isa ho tse mahareng. Sena se tla qala ho sebetsa ka la 1 Phato 2021 mme se fele ka la 31 Mphalane 2021.
- Dikgwebo tse ikobelang tefo ya lekgetho tse nang le tjhelete yohle e keneng (pele ho ditloso) di tla dumellwa ho diehisa 35% ya tsona ya dikoloto tsa Lekgetho la Lefa ha o ntse o fumana moputso (PAYE) tsa dikgwedi tse tharo tse tlang, ntle le ho fumantshwa dikotlo kapa tswala.

- Ho fanyehwa ha dikgafa tsa ka hare ho naha hodima dino tsa tahi nako ya dikgwedi tse tharo bakeng sa beng ba dilaesense ba ikobelang tefo ya lekgetho lekaleng la tsa tahi, ha ba etsa kopo ya sena mme ba bile ba fana ka mabaka a utlwahalng a sena.

Dintlha tsa felletseng tsa mehato ena ya kimollo ya lekgetho di ka fumanwa websaeteng ya Matlotlo a Naha dingolweng tse [hlahosang tse mabapi le mehato ena ya tshohanyetso ya lekgetho](#).

Ho fumana lesedi le fetang lena, ikopanye le SarsMedia@sars.gov.za